

26/09/2002

Wakil pembangkang pertahan IMF

reports on "Dewan Rakyat" by Nadzim Ahmad Jamalludin; Munaarfah Abu KUALA LUMPUR, Rabu - Seorang anggota pembangkang mempertahankan Tabung Mata Wang Antarabangsa (IMF) yang didakwa memainkan fungsi berkesan dalam membantu memulihkan ekonomi negara yang dilanda kegawatan.

Abdul Rahman Yusof (Keadilan-Kemaman) berkata, ekonomi Korea Selatan dan Thailand yang menerima bantuan IMF berada pada kedudukan yang lebih baik berbanding Malaysia.

"Apa salahnya IMF, Korea (Selatan) dan Thailand menggunakan IMF tetapi jauh lebih baik daripada kita," katanya ketika membahaskan Bajet 2003 pada persidangan Dewan Rakyat hari ini.

Beliau mempersoalkan beberapa tindakan kerajaan menangani kegawatan ekonomi dengan tidak mendapatkan bantuan IMF.

Beliau juga berkata usaha pihak pembangkang membentangkan "Belanjawan Alternatif" bukan saja mengejutkan Barisan Nasional, malah membuktikan bahawa pembangkang bersedia memerintah negara.

Katanya, pembangkang banyak memperoleh maklumat bagi merangka "Belanjawan Alternatif" menerusi laporan Bank Negara, Bank Pembangunan Asia dan Institut Penyelidikan Ekonomi Malaysia (MIER) yang disediakan pegawai kerajaan dan ia tidak sepatutnya dipertikai oleh kerajaan.

Beliau mendakwa Bajet 2003 yang dibentangkan Jumaat lalu oleh Perdana Menteri Datuk Seri Dr Mahathir Mohamad, yang juga Menteri Kewangan tidak mendatangkan banyak faedah kepada negara dan ia dibuktikan menerusi kejatuhan indeks Bursa Saham Kuala Lumpur Isnin dan semalam.

"Belanjawan alternatif yang dibentangkan pembangkang adalah ubat paling mujarab, oleh itu jangan malu dan jangan segan untuk menggunakannya, gunakanlah belanjawan alternatif," katanya.

Bagaimanapun beberapa anggota penyokong kerajaan membalas kenyataan Abdul Rahman itu dengan berkata: "pigi la..."

Datuk Mohd Ali Hassan (BN-Tebrau), yang mendapat laluan semasa perbincangan Abdul Rahman, menampar anggota pembangkang itu yang disifatkannya tidak mengambil pengajaran daripada kejatuhan ekonomi Indonesia yang mendapatkan bantuan IMF. - Bernama.